

蘇州文獻叢書第三輯


王衛平 主編

彭定求詩文集

下

【清】彭定求 著

黃阿明 點校



上海古籍出版社

蘇州文獻叢書第三輯

王衛平 主編

彭定求詩文集

下

【清】彭定求 著

黃阿明 點校



上海古籍出版社

南响詩稿卷二十

辛卯集下

桂香殿新工告成齋筵紀事憶舊述懷共成百韻

紫宮環太乙，黃道亘中天。闔闔扶輪上，羲娥轉轂前。斗魁齊玉曆，參首貫珠躔。遂有文昌府，爲司祿命權。畫疆臨海嶽，運紀屬璇璣。六宿匡如戴，三台座並聯。南宮方朗闢，東壁又高懸。炬奕神人泣，昭融主宰專。甫申原誕降，箕尾自回旋。特拯咸康劫，終成大洞仙。功完金籙授，秩晉寶綸宣。禮樂提衡重，圖書翼運綿。儒門資羽翰，藝圃藉陶甄。瑞毓原吳會，輝分自蜀川。延陵莊已廢，茂苑學重遷。攬秀峰居巽，迎禧象拱乾。嵯峨營傑閣，塏爽俯平曠。一迓奎光射，同看鳳彩拏。星移經雀鼠，代易震戈鋌。自睹荆榛闢，方隨藻苻牽。摳衣窺西室，鼓篋趁丁年。瑣尾行南粵，低頭向北燕。淺才仍蹇澀，標榜正喧闐。汨汨狂瀾湧，騰騰烈焰燀。寒窗吟闕寂，病榻卧迍邐。地靜秋香繞，神清夜月圓。鸞音來縹緲，鶴駕下踟躕。帝子弘開化，天曹慎進賢。儼聞金殿詔，恍示蕊宮篇。桂籍題名後，瓊林拔萃先。陸倕青管握，郭璞錦機穿。揣分殊惶悚，叨恩更憫憐。靈通湘浦瑟，義贈繞朝鞭。真賞投針芥，孤芳擷蕙荃。始知人事絀，別有化工全。闕隱其微矣，扶衰未爽焉。名場當偃仄，宦海鎮潺湲。席割猶無及，牀移竟未竣。論交神

黯黯，補過意恂恂。瓦礫還鎔鑄，塵埃急洗滌。榴皮書復寄，藜火杖頻然。拋却邯鄲枕，收回灑灑船。邗生甘讓祿，平子願歸田。得解岐塗眩，寧知捷徑猿。直廬紅日下，澗舍白雲邊。載振鐘鏞響，俄成琬琰鏤。膏肓需藥石，提命作韋弦。童冠偕來集，丹黃取次詮。鄉堪通德置，館擬次宗延。欲挽敦盤習，期將突奧研。驅馳聊奉檄，荏苒漫懷鉛。講舍翻經史，循牆肅豆籩。迢遙清禁漏，瑟縮腐儒瓊。束皙詩將補，高柴痛莫捐。羸軀淹聖室，幽夢伴荒阡。肯羨鯤程奮，那從駿足騫。藏身存故步，報國厪微涓。時譽機雲貴，詞華沈宋妍。入班遭忌刻，決策謝除銓。只有浮名誤，何由痼疾痊。孔賓歸計迫，孝緒遁思遄。尊渚波空闊，松籬氣鬱芊。此間真福地，到處似安禪。顧盼青牛至，招邀白鹿還。簪冠容壅逸，荷服任安便。獨立披光霽，端居屏醉眠。頽風羞蕩滌，俗學耻拘攣。華表人如在，朱章約敢愆。采真遊浩浩，樂善服拳拳。合許從弘景，長期訪偃佺。撫時驚隙影，問歲逼華顛。覺世心徒切，捫躬力已孱。龍從鼇岫側，邈眇鳳山巔。几席明輝度，縑緇雅教沿。清都瞻晃朗，聖域想高堅。祇惜垣墉薄，尤嫌棟宇薦。經營謀梓匠，勸贊施金錢。覆蕘培瑤砌，程材庀寶榘。霄階丹極麗，閣道碧城連。翠嶂檐端簇，明波檻外漣。落成稱廣廈，陝吉啓長筵。申旦趨踰肅，中宵澡雪虔。睟容垂穆穆，弘訓聆淵淵。冷雨祛浮瑱，靈飄蕩宿煙。鏗鏘纔奏樂，跼蹐遞陳箋。瑞靄飄金卮，晴曦映畫椽。監觀原不隔，陟降本無偏。頡頏懷球貝，檀鈞叶管絃。檢書香案吏，載筆玉樓員。大壯誠符筮，斯干可續編。良辰情悅豫，上巳色澄鮮。荀里猶停轍，程門尚接肩。憑虛當月窟，識景即花韞。浩澤敷三島，靈光燭八埏。綢繆師友誼，清淨水雲緣。陳蹟滋嘘嘒，哀悰倍潔蠲。彌綸依大造，汲引賴真傳。緱嶺笙吹近，吳門羽騎駢。身依瑤圃樹，心映碧池蓮。願乞新宮頌，氤氳烝萬千。

閣下消暑雜詠三首

懶向人間傀儡徒，閑栖幸得傍仙都。溪邊淥水明初漲，檐際青
柯潤轉蘇。敢把清言追魏晉，却思高坐講唐虞。是日讀《尚書》。流連
便欲忘歸去，半榻宜分月影孤。

苑門移坐得蕭閒，裹茗携蔬鎮往還。但覺好風雙樹下，不知烈
日九衢間。空濛灑烝分霞洞，縹緲清游想鳳山。霞洞、鳳山皆文昌蜀中靈
蹟。殿角涼生拋斷夢，天階也有侍書班。

無地消搖辟暑塵，緣溪聊作蹋冰人。禽鳴密葉頻催句，蟬噪高
枝亦爽神。弘景樓前松籟迴，稚川井畔藥苗新。憑虛便擬招尋去，
劫火何由絆此身。

小暑前禱雨作

愁聽村頭布穀催，雩壇精禱重徘徊。雲師祇向西郊度，風伯稀
從北陸來。諺云：“夏雨北風生。”冉冉三時多土坼，炎炎四壁少秧栽。澤
雷有象占隨獲，甘澍終應潤草萊。余揲著，得隨初九九四。

二十七夜得雨翼日復大雨

望斷雲頭雨似絲，膏流吳會轉遲遲。別鄉先經得雨。連朝已過分
龍候，五月二十爲分龍日。此夜纔當卧犢時。人力豈能敷灌溉，天心終
與慰耘耔。炷香重叩通明祝，好誦幽風七月詩。

雷霆行

辛卯五月日丁巳，驅除旱魃雨方始。黑雲油油亭午漫，傾盆一
決天河水。砉然震響憑豐隆，殷殷訇砰旋移晷。我當食次失箸驚，
真覺天威近如咫。無何聽得路人言，幾處行屍震擊死。胥江官舫

聯臄臄，禍及嬌兒與保姆。金甲神人鼓翅來，從旁羅綺銷如燬。又聞變告吳淞濱，旄麾奕奕當南指。健兒驍勇如五丁，駢首就殛同羊豕。舫客耕夫盡戰兢，填衢塞壑瞪目視。或云邦憲久逋誅，疏網恢恢靡漏只。或云積孽是前身，劫火難逃乃若此。神霄鈇鉞豈僭差，懲一還爲警百爾。桃花塢，齊女門，傳說重經播遠邇。破柱稍摧豪客魂，焚困更激貪夫耻。感此紀實爲作歌，恐懼修省象昭矣。

題騰蛟圖 明張厚卿仿李唐筆，余當望雨時，縣諸草堂二日，而雨大作。

六月驕陽正烜赫，十日不雨農其蹙。兀居搔首歎鬱蒸，昏曉焚香禮空碧。雨師何日決龍湫，恨乏銀瓶貯蜥蜴。撫景猶思篋裏圖，毫端縹緲煙雲色。規摹得自李將軍，未許時流競擘畫。驚波颺起失天青，急流倒注漫山黑。湧却神蛟鼓翅飛，橫空雨勢何蕩激。江邊茅屋八九椽，鄰翁拍手壓葦荻。樹影濤聲尺素間，摩挲愴怳搖心魄。滿堂顧影欲生寒，雲旗回風掩雌霓。果然靈物信有徵，呼吸潛通不可測。移時霖霖竟滂沱，灑遍東阡與南陌。點睛遮莫遇長康，一朝飛去無行迹。人間何處應龍靈，普潤埏垓濟蒼赤。

初八夜雨曉起看苗

蒸人溽暑病厭厭，半枕何由到黑甜。急雨乍聞鳴小砌，涼風已覺透疏簾。鄰鷄未唱星光斂，宿鳥將興露氣纖。盥漱便臨南陌望，青青細毳已如黏。

五更月下起坐

汗流枕簟黯噉呻，起聽殘更坐嚮晨。尚見星芒搖火樹，幾疑月影燦金輪。祖生漫有聞鷄興，莊叟空餘化蝶因。佇望銀河微浪起，陰膏霑潤莫踰旬。

月食夜天將明夢晤潛庵先生身似
天神之像坐而觀書敬紀二首

蟾輝重皎後，半枕夢魂清。師友原同氣，天人不二情。高冠長佩古，蕊簡玉函明。爲報霄階信，翛然薄世榮。

夫子崧高降，逢時亦偶然。功成垂寶籙，仙去返奎躔。棠蔭江邊在，霓裳月下傳。應憐蒼赤困，尚籲大羅天。

秋 蘭 二 首

蘭英續續又迎秋，夢繞湘江九畹遊。一夜堂坳香氣滿，水沉不用鼎中浮。

繽紛特發去年叢，玉綴霏霏入珮中。添得朝來雙盞至，芳心搖曳引秋風。

秋 暑 書 悶

風鳴期暑退，揮汗轉添愁。自覺形骸累，何由癬疥瘳。漫游思碧海，棲止想丹丘。勘破人間世，支離是我儔。

七月二十日紀夢

匡牀每趁夢魂清，邂逅神人拱揖行。肅肅靈壇朝太乙，輝輝法曜映長庚。爐煙縹緲當封事，劍佩趨蹌各贊名。鵠立不知塵界隔，微班或許綴通明。

早 起

兀兀迎涼候，惺惺待旦時。月高珠曜隱，雲淨錦章移。蛩語臨階急，鷄聲隔巷遲。誰能耽偃息，終夜墮殘肢。

二十一日中夜大雨

午夜淒清刻漏深，長風習習雨沉沉。已延秋籟將流火，弗遣炎威鎮鑠金。是日中伏第二庚。薤簟新涼拋半枕，芸窗微曙擁單衾。淩兢病骨應重爽，身外紅塵肯浪侵。

曉涼看苗

喜雨凌晨繞陌行，閑身健羨是躬耕。車頭昨日翻波緊，溝畔今朝積澆平。西閣看雲詩斷續，少陵有西閣詩。南垞泛水興縱橫。繫余寂寞孤村裏，叉手消搖百感生。

南堂觀雨二首

北風今日掩恒暘，雨脚淋漓白晝長。正待濕鳩鳴屋角，未須晴鵲下河梁。藥闌溉沃晚英秀，花架沾濡幽蕊香。赫赫炎官終稅駕，人間炙手爲誰忙。

清涼乍喜得支頤，葛屐綈鞋坐委蛇。鼃鼓重聞長誦處，蟲雷稍斂短眠時。地偏便可當虛榭，心淨何妨抵曲池。此意別無人共識，嵇山一老是吾師。

二十三日雨尚未止復作二首

溜聲徹夜寐仍吡，髣髴凌風到澗阿。雲陣幾回翻舞燕，江濤何處擁鳴鼃。常餐淡淡供蔬筍，野服疏疏采芰荷。便是老人尋樂處，休嫌歲月去如梭。

零禱多時禮碧空，沛然却待伏句中。真從星漢傾長浪，直自溟池擊遠風。江上深杯緣已斷，窗閒高枕興還同。關心賀雨連章在，問取當年植杖翁。

七月朔齋宿文星閣

秋到珠宮夜氣清，重來托宿致齋誠。鳥棲深樹音方息，蛩語平蕪候已更。繞檻斜侵銀漢迥，隔窗微逗玉繩明。中宵輾轉渾無寐，愴怳臨風羽翼輕。

曉起桂香殿朝真

又逢流火度文昌，晃朗芝壇氣鬱蒼。商律泠泠微入磬，素雲冉冉靜含香。旌迎帝子宣丹籙，佩接仙曹詠洞章。願向霄階供汛掃，沉沉劫火始消亡。

處暑日大雨徹夜

入秋方半月，好雨復如期。將爲苗含穎，非惟樹濯枝。調絃追舜律，鼓籥叶幽詩。容易逢年慶，皇哉造物慈。

露坐二首

雨餘月上暑微清，忽送長風樹杪聲。階下寒蟄如解事，人間多少不平鳴。

銀漢沉沉列宿稀，夜香遙帶白雲飛。洞霄仙子能相訪，物外良緣信可依。夜來夢見韓湘子談道。

繭園獨坐二首

三伏纔過雨又霖，乘涼散步一投林。窗前老樹鳴新吹，檻後修篁襲晚陰。隱几便堪隨蜨化，開編且喜斷蟲侵。南園別有幽棲地，遲我多年樂事尋。

經魚粥鼓已消沉，一室翛然似閩岑。小徑何妨蒿艾滿，短牆正

愛薜蘿深。敢同聲叟違時態，合向愚公印此心。坐久清風生腋底，
新秋景色入孤吟。

題 坐 右

白粥調飢好，清泉養液多。署門稀俗駕，散帙有高歌。密地心
當洗，虛中氣自和。莫將垂暮景，漫浪任蹉跎。

閑 詠 三 首

白露移秋令，新涼逗曉颺。茶煙縈戶早，香篆出簾遲。朗誦仙
家笈，微吟隱客詩。灑然華念絕，未許俗人知。

欲理登山屐，其如未疾侵。鹿門期不遂，緱嶺夢空尋。拂塵分
蕉影，投壺就竹陰。此生安隱地，賴是早抽簪。

問余迂轉甚，肉味却衰年。山芋新烹熟，溪菱小摘鮮。憎鴟銜
鼠腐，憐螿慕羊羶。思古欣心獲，栽蔬有和篇。朱子有和秀野蔬食詩。

象輝閣曉望西山

憑檻朝朝望遠山，逢秋山淨更開顏。天如雲谷冥濛裏，人在嵇
陰淡宕間。未駕篷舸猶悵悵，若携筇杖自閑閑。此生萬事輸禽向，
聊勝忽忽拄笏還。

紫微花今年開甚盛因用白香山韻

西軒花發去年叢，一倍繽紛照眼中。獨傍青林當杲日，未隨黃
葉落秋風。容輝猶映星辰色，蕃植全資雨露功。愧我顏頰漫相對，
敢將號托紫微翁。香山有“紫微花對紫微翁”之句。

晦日雨窗

稻花放處正纖纖，晴久重來暮雨淹。涼影驟生披氎穩，倦魔漸退坐香添。塵祛藥裹休輕試，蠹辟書帷更細拈。又過一年煩燠候，好臨月宇看新蟾。

八月朔旦曉至文星閣焚香

平明小櫂出溪南，雨霽橫空映蔚藍。入苑迥非前度暑，憑闌纔散幾重嵐。誰將柏露囊中滴，且向檀鈞象外參。洞府莫言雲路隔，蕭森舊隱即苔龕。

溧水門人王永觀來遊文星閣贈詩二首

客興乘秋款戶來，同行桂苑坐徘徊。城頭試看丹霞起，檻外方歎玉蕊開。闐闐迢迢生颯爽，湖山隱隱拂煙埃。仲宣賦筆應增麗，況是良辰勝賞回。

仙杏山邊得友生，旅愁相慰在蕪城。溪深自種梅千樹，壺冷聊憑酒一罍。借箸好咨韋白蹟，入林應識阮嵇情。不嫌蓬徑偏蕭寂，對榻聯吟續舊盟。

匏庵先生有蒲墩詩石田先生和之 余坐處亦有此物漫次原韻

水草新裁露氣乾，宛來壺裏跳雙丸。眠宜依席娛孤客，行不隨輪送老官。輾轉懷中原渾沌，揜撐肘後亦輕安。兩賢高致留佳句，想見當年入坐團。

白露後擬往西山不果志悵三首

生性蕭疏最愛山，比來兀坐掩芸關。昨朝欲挂蒲帆去，又爲餘

炎怯病顏。

虎山松籟激澄波，最好閒聽款乃歌。此樂尚輸漁父擅，那從槎客汎星河。

澗道行窩許我游，平池曲檻也清幽。等閒金谷名空在，居士惟應問四休。

重陽後素巖至草堂夜話

窮年兀坐病蹒跚，尺素頻傳會面難。駐景尚期丹液轉，撫時方憶菊英餐。茫茫萬事偏多感，落落初心却易安。剩有南園風月在，剪燈細語且盤桓。

對菊用匏庵先生手書原韻

淋漓遺墨染花香，采采真堪洗俗妝。暮雨既零疏蕊潤，曉霜纔點細叢長。老懷準擬從甘谷，病思端宜謝醉鄉。隱几垂簾還捉句，豈須插鬢趁重陽。

冬窗病中自警八首

強事朋儕助笑歌，光陰躑躅染衰痾。覆杯愁對重濡首，斂局慵看又爛柯。不爲簡緣離物累，那能定性養天和。函關一卷吾師在，蘸墨朝來會意多。重錄《道德經》一過。

焚香宴坐入圓中，佚老深知造物功。隨分冥心遊混沌，及時御氣返空濛。殘骸分作支離叟，頽景輸從矍鑠翁。頽滑須教餘習盡，寸陰珍惜夕陽紅。

心形久矣任疏頑，物外生涯寄世間。辟穀無能須量腹，栖巖未遂且鍵關。吸來沆瀣神方爽，灌得醍醐性本閑。塵迹莫侵苔影破，好留松菊伴僊顏。

世態崩騰等沸羹，達人休作不平鳴。擔囊揭篋尋常事，椎頰探珠旦暮情。絕迹只應追仲彥，遁形準擬托高卿。自從玩取蒙莊語，明鑑縣空萬象呈。

塵纓脫棄已多年，學道無成恨惘然。有甚工夫還拭涕，空餘歲月漫磨磚。風輪旋轉陰晴漏，月駕平分上下弦。猛省浮生何住著，惺然無夢到鈞天。

前塵暗裏墮紛紜，晚計方知事靜君。有女底須誇道韞，生兒何事譽宗文。梅栽嶺上春將曉，竹擊窗前雪正霏。證取當機消息在，蒲團坐穩定中聞。

知非改過敢差池，一息深深默自持。泚統封侯原偶爾，跼蹐鑑井更何之。加鞭急策征車迅，減擔深慚息足遲。試聽寒山好詩句，清鐘喚醒夢回時。

寂寞鄉中道味長，乾坤寥廓總蒼涼。祇應素我形骸外，那復從伊儻忽旁。藥裏君臣原自定，酒中賢聖等成狂。回光靜照渾無事，消得寒窗幾縷香。

贈南園同善會徐翁

每向南鄰步履停，道容相對眼長青。石頭有路參龐蘊，海曲無波訪蔡經。浩蕩禽魚歸澤藪，龍葱稷黍藝郊坰。引年不藉盈觴酒，笙鶴歌來靜裏聽。

喜楷庵學士見過留榻三宿

美人渺何許，悵望江雲漫。離愁閱三載，悠悠會面難。宵來枉帆至，倒屣忘蹒跚。榻塵方一掃，而不設盤餐。半壁青燈落，細語夜未闌。我懷方滯鬱，身如蕉槿觀。看君顏色好，綽綽行藏寬。冲融靜襟抱，浩蕩停汎瀾。交道日以薄，賴此臭如蘭。三宿不忍別，

目送高鴻翰。

徐果亭先生挽詞二首

霄漢縣卿月，如公雅望稀。早耽丘壑志，晚贊廟堂機。恪慎孚恩眷，冲恬蘊德輝。玉山光隱現，鶴馭幾時歸。

文章資典則，政事倚鈞衡。初服巖扉遂，遺經篋笥盈。問年躋大耋，繕性識全生。丹旆雲中度，難忘執紼情。

哭丁氏妹六首

設帨時余及五齡，啼聲記得下樓聽。垂垂六十三年事，腸斷今朝夢杳冥。

早時摧殞北堂萱，同氣依依繫拙昇。親送結褵隨膝下，春芳爛熳水環村。

兩姑之間以孝稱，燕喜悠長慰寢興。底事才名題柳絮，慈親胎教善相承。

誦詩早爲解膠盞，不遣司衾感嚙東。珠樹翩翩連理茂，應知坤德最寬洪。

今春來止話離愁，重向南樓十日留。提起胎衣曾落處，浮生惆恍欲回頭。

艤舟歸去水瀾瀾，悵望啼鶯乳燕時。誰料眼前成死別，空餘老淚到今悲。

哭吳氏姊六首

哭妹重爲哭姊來，蒼黃血淚瀉沉哀。南樓聚首時無幾，連袂淒淒向夜臺。

姊德真誠俗所稀，終身憔悴亦忘機。比肩綸翟方誇耀，不恨蕭

蕭舊縞衣。

舉案難期到白頭，也將夫子比黔婁。女師遺範彫零日，古貌迎人罕匹儔。

我昔垂髫姊及笄，神傷失恃暗悲啼。黃泉此去逢慈母，應話幽明夢未迷。

猶及牀前永訣時，未曾怛化至嗟咨。女身偶現原如幻，脫迹塵氛是所期。

情親早歲托潘楊，宿草多年欲斷腸。律公歿已十有四年。今日更傷同乳盡，仲家遺恫歲時長。子路有姊喪，見《檀弓》。

南昀詩稿卷二十一

壬辰集

元日書懷二首

老來良畏改年頻，元日還臨本命辰。日值乙酉。浩蕩自容叨覆載，衰遲那得報君親。爲農願卜田功稔，懷古期留里俗淳。宵旦焚香危坐處，省躬珍重景光新。

蒿蔚長懷久署門，閒棲便似傍山村。夢清弗惹梅花帳，興汰空餘竹葉尊。僂俛加餐慚素飽，凌兢養疾愛春溫。殷兄張丈飄零後，年少情悰莫漫論。樂天詩：“猶有誇張少年事，笑呼張丈喚殷兄。”

二日雨窗

扃戶辭塵迹，迂疏任俗嫌。剛苓調藥鼎，掃蠹整芸籤。換骨丹難乞，安心法可拈。垂垂簷溜裏，晝漏已重添。

三日夜坐

迢迢中夜漏，爆竹幾聲稀。夢亦惺惺著，心惟息息依。褰帷挑宿火，面壁候朝暉。齋祓思無替，扶衰或庶幾。

文星閣下焚香

珠宮鎮日好盤旋，薰沐朝來又判年。塵壒全消春靄靜，晴曦徐引景飈鮮。鵝湖鹿洞思如在，石室金庭夢宛然。祇愧洪鈞陶鑄久，側身空自老林泉。

人日看月

夜窗蕭寂倚檐前，新月今年第一弦。世上琉璃燈影遍，誰知散自鬱羅天。

十一日作

每屆元正便愴魂，垂垂二紀淚頻吞。三身曾是生前證，先君早好禪學。百歲誰能世上存。先君癸丑生，今方一百年。寥歷文壇新畫桷，文星合祠重建。蕭閑柳徑舊衡門。南園書屋重立宗祠。焚香瞻望神遊處，留取遺經迪後昆。

有餉西洋酒者略試之作惡殊甚益堅酒戒

劉郎漫飲中山酒，埋却千日如酖受。蘇公雅造真一名，不在青州從事後。餹糟啜醜幻態紛，公瑾交醇故無耦。我衰不克勝三蕉，齋居況復方離垢。竭來致此海西醕，當前便合輕揮手。欸令鬲上住督郵，焦灼臟腑滋噎嘔。自憐不是渴羌徒，率爾延寇徒貽咎。誰能飲量等鴟夷，癖嗜頽然云適口。辟寒且作屠蘇觀，呼僮移贈化烏有。北苑春芽篋裏藏，緩火浮香滿松牖。世間棄取判薰蕕，觸物警心慎毋苟。

延平劉孝廉正思贈武夷茶上品三種喜爲作歌

幔亭峰上白雲鄉，氤氳瑞草涵芬芳。吾生塊處老一室，何由